

পূণ্যাত্মার সফেদ পোশাক

Shah Mohammad Fahim

2013-02-28 15:45:00 +0600 +0600

1 MIN READ

সেই কবে বিশ্বাসের সোয়ারিরা এসেছিল
ভাটি বাংলায়
রাসুলের জমানায়,
ঘোড় সোয়ারি হয়ে নয়
কাঠের নৌকা ভাসিয়ে
আরব সাগর হয়ে বঙ্গোপসাগরের উপকূলে,
সফেদ পোশাকের পূণ্যাত্মা আবু ওয়াক্কাস
আর তার সাথীরা,
পরম মমতায় বিশ্বাসের বীজ বুনে দেয়
কর্দমাক্ত উর্বর জমিনে,
আতরাফ মানুষকে শেখায় মুক্তির শ্লোক
জাত-পাতহীন, শ্রেণীহীন সমাজের তত্ত্ব
গোঁথে দেয় মূর্খ কৃষকের ক্লবের ভেতর,
ক্লবে ক্লবে জিকির তুলে তা
প্রবাহিত হয় প্রজন্ম থেকে প্রজন্মে।

তারপর সভ্যতার উত্থান-পতনে
আল্লাহর তরবারি হয় শোষকের হাতিয়ার
শান্তির ইসলাম মুখ লুকায় মসজিদের কোণে,
আর মজলুমের লড়াই
সেতো মধ্যযুগীয় বর্বর ক্রুসেড
সম্রাসবাদের আধুনিক সংস্করণ,
বেহেশতের লোভ দেখিয়ে
ভাটি বাংলায় প্রচার হতে থাকে
দুনিয়াদারির নতুন তত্ত্ব,

কিন্তু মূর্খ কৃষকের ক্লবের ভেতর শুধু আল্লাহ আল্লাহ,
শ্রমের মজুরি বুঝে নিতে চায় সে ঘাম শুকানোর আগেই
চায় ফসলের সুষম বন্টন,
প্রতীক্ষায় থাকে আবার কবে
বঙ্গোপসাগরের উপকূলে
হাওয়ায় দুলে উঠবে পূণ্যাত্মার সফেদ পোশাক।